



SERMON. VNZIEME,
SVR LA PAIX,

S V R

CES MOTS DE L'E-

uangile de Nôtre Seigneur Iesus
Christ selon S. Jean , ch. 14.

verset 27.

*Je vous laisse la Paix : Je vous donne ma
Paix , Et ie ne vous la donne point, com-
me le Monde la donne.*

MES FRERES , entre les belles Proph. 31
instructions que la Reyne
Bethsabée adresse au Roy Sa-
lomon son fils, celle-cy est des
plus remarquables, *Donnez de la ceruoise
à celuy qui s'en va perir , & du vin à celuy
qui a le cœur outré : afin qu'il en boine &
qu'il oublie sa pauvrete , & qu'il ne se sou-
uienne plus de sa pêne.* A prendre ces
mots dans le sens literal , presque tous

X x 3 les

les Interpretes entendent par ce vin, le vin mixtionné que l'on auoit de coutume de donner à boire aus criminels condannez à la mort. C'étoit pour leur ôter les horreurs de leur suplice, pour assoupir leurs sens, & pour rendre leur tourment plus suportable. l'estime que c'est de ce vin-là d'où il est parlé au 15. de S. Marc, lors qu'il est dit qu'auant que de crucifier N. Seigneur Iésus Christ, on luy presenta du vin mixtionné avec de la myrrhe, mais qu'il n'en voulut point boire. Ce vin qu'il faut donner à boire aus affligez, peut bien aussi estre pris en vne signification plus generale, pour la coupe de consolation dont parle Ieremie le Prophete au seizième de son liure.

ff. 184. Le vin réjouit le cœur de l'homme;
Nomb. 15. Et même durant les ceremonies de la Loy Mosaique, Dieu auoit commandé de faire vne asperision de vin sur les sacrifices de prosperité, que l'on faisoit funier deuant luy, *en odeur de bonne senteur.* C'est à quoy regarde Iothan fils d'Abimelec, lors qu'il introduit la vigne disant aus arbres qui vouloient *Iugos 9.* qu'elle regnât sur eus, *Quiteray-je mon*
bon

bon vin qui réjouit Dieu & les hommes, pour aler tracasser par les autres arbres ? A cause de ce double usage, le vin est le symbole de la ioye celeste & des consolations du S. Esprit. De sorte que ces mots, *Donnez du vin à celuy qui a le cœur outré*, signifient dans leur sens mystique, Versez dans les cœurs les plus tristes & les plus affligés, des ioyes & des consolations spirituelles & celestes, qui noient toutes leurs tristesses, & qui dissipent tous leurs ennuis.

Ce que Betsabée recommande à Salomon, qui étoit la figure viuante de Iesus Christ, *ce bien-heureux & seul Printe* le pratique avec vne charité toute divine. Il donne le vin de son Royaume à celuy dont le cœur est en angoisse : Il console l'ame affligée ; Et réjouit les os brisez. Il fait resplendir les plus claires lumieres de sa grace dans les plus épaisses tenebres de nos miseres : Il verse le plus précieux baume de Galaad dans nos playes les plus cuisantes & les plus douloureuses ; Et il épand ses consolations les plus fortes & les plus efficaces dans les âmes les plus abatuës &

1. Tim. 6.

2. Cor. 1. Ps. 51.

Xx 4 les

les plus affligées. Quelque rudes que soient nos épreuues, & quelque violens que soient nos combats, nous pouuons bien dire, que si les afflictions abondent de par Iesus Christ, de par luy même aussi abonde la consolation & la ioye. Et nous auons tout suiet de nous écrier
 2. Cor. 7. *auec le S. Apôtre, Je suis tout plein de ioye: Je suis remply de consolation tant & plus, en toute mon affliction.*

De cette charité du Seigneur Iesus à consoler les affligez, nous auons vn riche & magnifique exemple dans le chap. 14. de S. Iean. Les Apôtres étoient saisis de la plus efroyable tristesse qui puisse iamais tomber dans vne ame fidele. Ils étoient sur le point d'estre priuez de la douce & salutaire compagnie de I. Christ leur Seigneur & Sauueur, leur Pere & leur Roy. Cette separation inopinée leur causoit vne douleur plus aiguë, que si on leur eût arraché le cœur & déchiré les entrailles. Ils voyoient ce misericordieus Sauueur d'as vne extrême
 Luc 22. *me agonie, iusques à suer des grumeaus de sang. Ils entendoient les sôûpirs & les gemissemens que la pesanteur de*
 nos

nos pechez arrachoit de sa poitrine. Ils se representoient ce Roy de Gloire, que les Anges adorēt, tout prêt à estre cloüé & ataché à vne Croix infame, entre des brigands. Mais ce qui rend leur amertume encore plus amere, est qu'ils sauvent cette ancienne Prophetie, *le fra-* Zach. 13.
peray le Berger, & les brebis seront éparſes; Et qu'ils viennent d'apprendre de la pro- Jean 13
 pre bouche de ce diuin Pasteur, que l'un d'eus le deuoit trahir, & qu'un autre le renieroit même iusques à trois fois.

Toutes ces images afreuses se presentant à leurs yeus, les efrayent & les metent à deus doigts près du desespoir. Ils sont cōme engloutis par la tristesse, Et il se peut dire d'eus comme de la Sainte Vierge, *qu'une épée a percé leur* Luc 2.
ame. Mais le ſouuerain Sacrificateur, *miſe-* Ebr. 2.
ricordieux & fidele, ne les abandonne point dans ces cuisantes douleurs & ces angoisses mortelles. Il presente pour eus à Dieu son Pere, ses prieres les plus ardentes : Il les recommande à son ſoin Jean 17
 paternel, & à sa protection diuine : Il les assure de son amour par des paroles
 routes

routes de feu & de flame; Et il les réjouit
 & les fortifie par tout ce que le Ciel a de
 plus dous, de plus consolant & de plus
 efficaceus. Il leur découure, comme à
 ses plus chers amis, tous les secrets de
 son Pere celeste. Il leur fait comprendre
 que pour leur propre salut il est expé-
 dient qu'il *delaisse le Monde*, eu égard à
 sa preséce corporelle, & qu'il aille com-
 paroître pour eus dans le Sanctuaire
 celeste. Il promet qu'il ne les laissera
 point orphelins : mais qu'il leur en-
 uoyera le Consolateur, l'Esprit de Ve-
 rité, qui non seulement sera à iamais au
 milieu d'eus, mais qui habitera dans
 leur cœur, comme dans le temple de sa
 Sainteté & sous le pavillon de sa Gloi-
 re; Et qui non seulement les réjouira &
 les fortifiera, mais qui les rendra en
 toutes choses plus que victorieus. Enfin,
 en leur disant le dernier Adieu, il ne se
 contente pas de leur ouvrir son cœur,
 & de leur souhaiter toutes sortes de
 benedictions & de prosperitez : Mais
 pour vne marque infaillible de son
 amour inuiolable, & pour vn acte as-
 suré de sa souveraine Beatitude, & de sa
 Gloire

Gloire eternelle, il leur donne tout ce qu'il a de plus cher, de plus precieus, & de plus diuin. *Je vous laisse ma paix: Je vous donne ma Paix, & ie ne vous la donne point comme le Monde la donne.*

Nous auons creu ne pouuoir rien choisir de plus conuenable à ce iour solennel: Non seulement à l'ocasion de la Paix qui vient d'estre publiée, à la ioye & consolation de tous les bons François: Mais aussi, parce que nous sommes assemblez pour celebrer la sainte Cene de N. Seigneur, à laquelle quelques Anciens ont donné le nom de Paix; & qui est en eset le Sacrement de nôtre Paix & de nôtre reconciliatiô avec Dieu. Ioint que comme les Enfants d'Israël en mangeant l'Agneau Pascal, deuoient auoir des souliers en leurs pieds: De même pour faire dignement la fête de Iesus Christ nôtre Pâque, qui a esté sacrifié pour nous, il faut que nous ayons *les pieds chauffez de la preparation de l'Euangile de Paix.*

Exod. 1.

1. Cor. 5

Ephes. 6

Pour bien entendre les diuines paroles de nôtre texte, nous aurons, avec l'assistance de Dieu, à considerer, premiere-

mierement, quelle est la Paix de Iesus Christ; & en second lieu, quelle est la Paix du monde, & quelle difference il y a entre l'une & l'autre Paix. Seigneur Iesus, qui par le sang de l'Alliceance eternele nous a aquis cette bien-heureuse Paix, l'admiration continuelle des hommes & des Anges, donne-nous d'en contempler aujourduy la celeste beaute, & d'en sentir les delices innarrables.

DE LA PAIX DE IESVS CHRIST.

Il n'y a rien au Monde de plus necessaire ni de plus desirable que la Paix. C'est l'apuy de l'Vniuers, la colonne des Etats, le bras droit de la Iustice. C'est elle qui anime les Loix, qui fait fleurir les vertus, & qui rejouit toute la Terre. Sans la Paix nostre vie n'est qu'une mort, & toutes nos plus grandes douceurs se changent en amertume. Il se peut dire de la guerre ce que le Prince des Philosophes dit de la mort, *Que de toutes les choses terribles, c'est la plus efroyable.* Et de fait, elle met en un horrible desordre & en une desolation extreme

extrême ce qu'il y a de mieus policé
& de plus delicieux au Monde. Elle em-
brase les Empires les plus florissans , &
les reduit en poudre. Elle infecte & em-
puantit l'air d'impieté & de blasphemes:
Elle soüille les lieux les plus saints,
des ordures les plus infames. Elle rem-
plit tout de feus , de sang & de carna-
ge. En vn mot , elle fait voir sur la Ter-
re les horreurs de l'Enfer. Certainemēt
ce n'est point sans raison que le Roy
Dauid ayant à choisir l'vn de ces trois
fleaus, la peste , la famine , & la guerre,
choisit la peste , & témoigna que sur
tout il craignoit & aprehédoit la guer-
re. En effet , c'est le plus hideus de tous
ces trois fleaus: Et qui plus est il entraine
ordinairement les deus autres. Car bien
souuent la guerre est cause de la famine,
qui en tuë & en deuore plus que l'épée :
Et elle engendre la peste qui vandange
& les vaincus & les victorieus.

Par la Paix & la concorde, les plus
petites choses s'acroissent: Et vne petite
pierre deuient vne grande montagne.
Mais par la guerre & la discorde les plus
grandes s'écoulent , & les plus super-
bes

les Monarchies s'évanouissent. C'est pourquoy nôtre Seigneur Iesus Christ disoit aus Iuifs, *Tout Royaume diuisé cõtre soy-même sera réduit en desert; Et toute ville & toute maison diuisée cõtre soy-même ne subsistera point.* Et l'Apõtre escriuoit aus Galates. *Si vous vous entremordez & entre-rongez, vous serez consumez l'un par l'autre.* Mieux vaut vn moreceau de pain sec, où il y a Paix, qu'une maison plene de viandes aprêtées, où il y a des querelles. Mieux vaut plein le creus de la main avec repos, que les deus mains plenes avec trauail & rögement d'esprit.

Dieu luy-même opose la Paix à toute sorte de maus & de miseres. Comme lors qu'il dit par son Prophete Esaië, *C'est moy qui forme la lumiere, & qui crée les tenebres: qui fait la Paix, & qui crée l'aduersité.* Et comme il n'y a point de mouuement bien réglé qui ne rende à vn certain repos: Ainsi il n'y a point de guerre legitime qui n'ait pour but la Paix & la tranquillité publique.

Enfin, comme la guerre exprime toutes les miseres & toutes les afflictions imaginables, aussi à l'oposite la Paix comprend

comprend toute sorte de benedictions & de prosperitez. Et non seulement elle comprend les benedictions temporelles que Dieu épand d'une main liberale, même sur les enfans de ce Siecle; Mais aussi les graces & les faueurs spirituelles qu'il ne communique qu'aux Eleus & Fideles. Et qui plus est, toute la Gloire du Ciel, & toutes les Felicittez du Paradis nous sont représentées sous ce beau & aymable nom de Paix.

De là vient que les Enfans d'Israël exprimoient leurs plus riches souhaits, par ces douces paroles, *Paix vous soit.*

C'est ainsi que Dieu parle luy-même à son Prophete Daniel, *Ne crain point, homme agreable, Paix soit avec toy.*

Dan. 10

Ce sont les premiers mots que Iesus Christ proféra, lors qu'apres sa glorieuse resurrection il se fit voir à la compagnie de ses

Ioan. 20

Apôtres, *Paix vous soit.* C'est par cette salutation cordiale que ces Saints hommes de Dieu, cōmencent leurs diuines Epîtres, *Grace vous soit & Paix de par Dieu nôtre Pere, & de par I. Christ nôtre Sauueur.*

Sous la Loy de rigueur Dieu se fait voir souvent avec des foudres en la main,

main, & avec des feus consumans, qui sortent de sa bouche. Il s'apele d'ordinaire *Le Dieu des armées*, & *le Dieu Fort des vengeance*s. Mais sous l'Evangile de grace il nous découure des flammes d'amour, & des entrailles de Pere. Il se nomme *Le Dieu de Paix*, *Le Pere des misericordes*, & *le Dieu de toute consolation*.

1. Roys

19.

C'est sous cette douce & misericordieuse dispensation, que Dieu acomplit parfaitement ce qu'il representa autrefois en vision à son Prophete Elie. Car il n'est point avec le vent impetueux qui renuerse les montagnes & qui brise les rochers: Il n'est point avec les esprits turbulens, qui de gayeté de cœur choquent les Etats, & bouleversent les Empires. Il n'est point avec le tremblement & avec le feu: Avec les émotions déreglées & avec la flamme de diuision & de discorde. Mais il est avec vn son coy & subtil, qui est le symbole de la Paix & de la tranquillité: Il se plait avec les cœurs qui brûlent d'un saint amour & qui sont vnis ensemble par le lien de la Paix. Il possède dans le Ciel vne Paix qui ne peut iamais estre troublée.

blée. Dans ce magnifique Palais de sa gloire, il se fait voir non point avec des foudres & avec vn équipage de guerre : mais avec vne robe de Paix. Car il s'en-
 uelope de splendeur, comme d'un vê-
 tement ; Et il habite en vne lumière in-
 accessible. Ps. 104.
1. Tim. 6.

Iesus Christ, le Monarque de l'Eglise s'apele par excellence, *Le Prince de Paix*. C'est ainsi qu'il est qualifié au 9. d'Esaïe, *L'enfant nous est né, le Fils nous a esté donné, & l'Empire a esté posé sur son épaule; Et on apelera son nom, l'Admirable, le Conseiller, le Dieu fort & puissant, le Pere d'Eternité, LE PRINCE DE PAIX.* C'est à cause de cela qu'il a esté figuré
 par Melchisedech entant que Roy de *Salem*, c'est à dire, Roy de *Paix*. C'est pour le même sujet qu'il a eu pour type, & pour figure le Roy Salomon, c'est à dire, le Roy *Pacifique*, dont le regne a esté vn regne de Paix & de felicité. Ce Roy de Paix est né par vne Prouidence de Dieu toute particuliere, durant la plus profonde Paix qui fut iamais au monde ; & lors que dans Rome le temple de Ianus étoit fermé, qui étoit vne
 Y y marque

marque de la Paix vniuerselle par tout l'Empire Romain. C'est pourquoy les Armées celestes, comme metant bas les armes, chantèrent à sa naissance, *Gloire soit à Dieu aus Cieux tres-hauts; Et en Terre Paix enuers les hommes du bon plaisir.* Et lors qu'il fit son entrée trióphale à Ierusalem, les peuples crioient à haute voix, *Benit soit le Roy qui vient au Nom du Seigneur: Paix soit au Ciel, & gloire aus lieux tres-hauts.*

Dans ce glorieus Palais de l'Immortalité où il habite, il a toutes les marques de la magnifique Paix de son Royaume. Et de fait, il aparoit à S. Iean non point armé, mais reuêtu d'une robe de Paix: Il étoit semblable à un homme vêtu d'une longue robe, & ceint d'une ceinture d'or à l'endroit des mamelles. Que s'il a une épée rigüe à deus tranchans, elle sort de sa bouche, pour nous aprendre qu'elle est l'emblème de sa sainte & diuine Parole, qui est viuante & d'eficace, & plus penetrante que nulle épée à deus tranchans, & qui ataint iusques à la diuision de l'ame & des iointures & des mouëllles, & qui est iuge des pensées & des intentions du cœur.

œur. La tête de ce Prince triomphant est couronnée de *l'arc en-Ciel*, pour nous faire voir qu'il est le Roy de Paix. Et qui plus est, ce trône glorieux où mille millions le seruent, & dix mille millions l'adorent, est environné de *l'arc en ciel*, qui est le symbole de la Paix & de la reconciliation du Ciel avec la Terre. C'est pour nous assurer que c'est vn *Trône de grace*, d'où ce Souuerain Monarque tend à ses *Eleus & Fideles* le sceptre d'or de ses misericordes.

Apoç. 21.

Dan. 7.

Ester 5.

La liurée de l'Eglise, c'est la Paix : Comme elle le dit elle même au 8. des Cantiques, *La liurée que ie porte, c'est l'amour.* Et c'est en quoy elle a esté figurée par le temple de Salomon, qui fut bâti de telle sorte qu'on n'ouit pas vn marteau, ni une hache, ni aucun outil de fer. Bien-heureus sont ceus qui procurent la Paix : car ils seront apelez Enfans de Dieu.

1. Rois 6.

Apoç. 1.

La sainte Cité que Dieu a bâtie toute d'or & de pierres precieuses pour estre le sejour eternel de la gloire & de l'immortalité bien-heureuse, s'apele *Iernsalem*, c'est à dire la vision de Paix, parce

Matt. 5.

Y y 2 que

que c'est là où la Paix est élevée sur un trône, & où elle fait voir sa pompe & sa magnificence. Les douze portes de cette *Cité du Dieu Vivant*, qui sont douze perles, ne se ferment jamais, parce qu'elle ne craint point l'entrée ni le dégât de toutes les Puissances ennemies. C'est pourquoy le Disciple bien-aimé vid cette *Ierusalem nouvelle descendante du Ciel de deuers Dieu*, non point comme une ville de guerre, mais comme une *Epouse ornée pour son mary*.

Apec. 7. Les habitans de cette pompeuse Cité ne sont point armez, mais ils sont revêtus de longues robes blanches, qui sont des robes de Paix. Ils n'ont nulles armes, ni ofensives ni defensives, mais ils ont sur leurs têtes des Couronnes d'or, & en leurs mains des palmes, des harpes, & des phioles d'or plénes de parfums. Et il sort de leurs bouches, non point des cris & des alarmes, comme des gens qui ont peur, ou qui combattent : mais des aclamations de ioye, comme de personnes qui ont obtenu la victoire, & qui triomphent. Ils jouent de leurs harpes, & chantent comme

vno.

vne *chanson nouvelle*. Ils châtent le can- Apo.
 tique de Moïse & le cantique de l'A- 15.
 gneau. Ils reperent sans cesse leurs Hal- Apo.
 lelu-jah & ces rauissantes voix de Iubi- 19.
 lation, *Exouïssons-nous & nous égayons, &*
donnons gloire au Seigneur nôtre Dieu: Car
les noces de l'Agneau sont venues & sa fem-
me s'est parée.

Ce n'est donc pas de merueilles si
 nôtre Seigneur Iesus Christ qui fait son
 Testament, & qui dispose de sa der-
 niere volonté, abandonne son Corps à
 la Terre, laisse à Iudas ce peu d'argent
 qu'il possédoit, remet son ame bien-
 heureuse entre les mains de Dieu son
 Pere, & donne sa Paix à ses chers Apô- Jean 13
 tres qu'il a ayez iusques à la fin. *Je vous*
laisse la Paix, leur dit-il, *Je vous donne*
ma Paix. Car cette Paix dont il parle, est
 vne Paix celeste, spirituelle & eternal-
 le, en laquelle consiste nôtre bon-heur
 & nôtre ioye, nôtre gloire & nôtre
 souueraine felicité.

Cette glorieuse Paix consiste prin-
 cipalement en trois articles: dont le
 premier est nôtre reconciliation avec
 Dieu: le second, nôtre acord avec

Y y ; toutes

toutes les créatures , & particulièrement avec les hommes & les Anges ; Et le troisiéme est la Paix avec nous-mêmes.

1. Le Diable n'a pas esté si tôt précipité du Ciel dans ce bas Vniuers, qu'il y a alumé la guerre , & a porté les hommes à la reuolte & à la rebellion contre leur Createur. Nous étions tous *ennemis de Dieu en nos entendemens & en nos mauvaises œuvres* : Nous luy faisons la guerre par nos pechez & par nos crimes ; Et luy s'étoit déclaré nôtre ennemy , & nous poursuivoit avec les armes de sa iuste vengeance. Mais maintenant nôtre Paix est faite avec Dieu, & sa Iustice est desarmée : De sorte que nous ne le regardons plus avec efroy comme vn Roy irrité , ou comme vn Iuge inexorable : mais nous l'embrassons avec ioye comme vn Pere benin qui nous tend les bras de ses eternelles miséricordes. Sa voix n'est plus cet épouuantable tonnerre qui ébranle les montagnes, qui renuerse les cedres, & qui fait faonner les biches : mais c'est vne parole douce & amiable , qui rassure nos
ames

Coloss. 1

Esaië
63.

Ps. 19.

ames tremblantes , qui relève nos consciences abatuës , & qui nous fait concevoir *la bien-heureuse esperance* de la Gloire & Felicité du Royaume des Cieux. De son Trône ne procedent plus Ex. 19. les foudres & les flames qui étonnent les plus grands Prophetes , mais les Apoc. 4. éclairs & les lumieres qui réjouissent & qui consolent les cœurs des plus humbles. C'est pourquoy , au lieu de dire avec Adam, *J'ay ouï ta voix, & ie me suis* Gen. 3. *caché* , nous dirons plutôt avec Dauid, *J'écouteray ce que dira le Dieu Fort l'Eternel : car il parlera de Paix à son peuple & à ses bien-aimés.* Et au lieu de dire comme Moïse, *Je suis épouvanté, & j'en trem-* Ebr. 12. *ble tout*, nous dirons avec l'Apôtre, *Alons* Ebr. 4. *avec assurance au trone de grace , afin que nous obtenions misericorde , & que nous trouuions grace , pour estre aydez en tems conuenable.*

II. Lors que nous étions dans le crime de leze-Majesté diuine, & que nous faisions la guerre à Dieu , toutes les creatures étoient armées contre nous, pour venger l'outrage fait au Createur de l'Vniuers : Mais depuis que I. Christ

Y y 4 2

a fait nôtre Paix, & que Dieu est pour nous, rien ne peut estre contre nous.

Rom. 8. Au contraire toutes choses aydēt ensemble en bien à ceus qui l'ayment. Et particulièrement nous auons esté recôciliez aues les hommes & auec les Anges du Ciel.

Coloss. 1. Car le bon plaisir du Pere a esté de reconcilier toutes choses à soy, à sauoir tant les choses qui sont aus Cieux que celles qui sont en la Terre, en faisant la Paix.

Auparauant les hommes étoient loups les vns aus autres; Et un chacun

Esaië 9. mangeoit la chair de son bras. Mais par cette Paix de Iesus Christ nous voyons acompany ce qui auoit esté predit par les

Es. 11. Prophetes, Le loup habitera avec l'agneau, & le leopard gîtera avec le chevreau: le veau & le lionceau seront ensemble: la ieune vache paîtra avec l'ourse, & leurs petits gîteront ensemble: l'enfant qui tete se jouera sur le trou de l'Aspic, & l'enfant qu'on sèvre metra sa main au trou du basilic: On ne nuira point & on ne fera aucun dommage à personne, en toute la montagne de ma Sainteté: Car la Terre aura esté remplie de la connoissance de Dieu, comme le fond de la mer des eaus qui la courent. Non seulement

ment les hommes qui ont fait leur Paix avec Dieu ne se font plus la guerre , & ne nuisent plus les vns aux autres , mais ils sont liéz ensemble par le lien de la Paix & de la charité , qui est le lien de *Coloss. 3* perfection. Et non seulement ils ne se regardent plus comme ennemis , mais ils s'embrassent comme freres , & s'entrayment cordialement comme membres d'un même corps , & comme estant animez d'un même esprit , & aspirans à un même heritage.

Les Anges de Dieu ne paroissent plus aujourduy avec des armes de vengeance & de destruction , comme ces Cherubins qui avec des épées de flamme de feu , empêchoient nos premiers parens de rentrer dans le Paradis & d'approcher de l'arbre de vie : Comme cet Ange destructeur qui à minuit frapa tous les premiers-nez d'Egypte , depuis le premier-né du Roy iusques au premier-né des esclaves : Comme cet Ange qui en un même iour fit mourir de peste soixante & dix mille Israélites : Ou comme cet autre Ange qui en vne seule nuit tua cent quatre-vingt-cinq mille

Gen. 3.
Ex. 12.
2. Sam. 24.
2. Rois 19.

mille hommes de l'armée de Sennacherib. Mais ces Esprits celestes se font voir avec des robes de Paix; Et ils se plaisent à nous annoncer des nouvelles de ioye & de consolation. Comme cet

Luc 2. Ange revêtu de lumiere, qui annonça aus Bergers la bien-heureuse naissance du Sauveur du monde. Ou comme cet

Mat. 28 autre Ange, dont le vêtement étoit *blanc comme neige*, qui annonça aus saintes femmes la glorieuse resurection de

Luc 1. ce Prince de vie. Ou enfin, comme ces deus Anges *revêtus de blanc*, qui assurèrent les Apôtres, que ce Iesus qu'ils auoient contemplé montant au Ciel, en descendroit de même pour iuger les vi- uans & les morts.

III. Nous n'étions pas seulement en guerre avec Dieu & avec nos prochains, mais aussi avec nous-mêmes. Il y auoit au dedans de nous vne legion de conuoitises charnelles qui faisoient la guerre à nôtre ame; Et qui se la faisoient les vnes aus autres. Car la plus-part de ces maudites conuoitises sont comme autant de Furies qui se prennent à la gorge, & qui tâchent de se suplanter. Témoin l'auarice,

l'avarice , l'ambition , la volupté & les autres pestes semblables. Nous étions suiets à des angoisses mortelles , & à des horreurs de conscience qui ne se peuvent exprimer. Nous sentions dès cette vie la gêne de feu & les tourmens de l'Enfer. Mais dès que nôtre Paix est faite avec Dieu , le sentiment de cette Paix est si dous & si ravissant , qu'il allume en nous *vne ioye inenarrable & glorieuse*; ^{1. Pier. 1} Et il fait que nôtre cœur est comme dans vn festin continuel. C'est de ^{PRON. 15} cette glorieuse Paix dont parle S. Paul au 5. des Romains, lors qu'il dit, *qu'étant justifiez par la Foy nous auons Paix enuers Dieu, & nous-nous glorifions en l'esperance de la gloire de Dieu.* Ce grand Apôtre qui ^{2. Cor. 12.} auoit esté ravi iusques au troisième Ciel , & qui auoit contemplé de ses yeus la gloire du Paradis , ne trouue point de termes pour exprimer la dignité de cette Paix celeste. Il dit que c'est *vne Paix de Dieu qui surmôte tout entendement*: ^{Phil. 4.} C'est à dire vne Paix excellente & diuine , qui va au delà de toutes les pensées & des hommes & des Anges. Il n'y a que celuy qui a part à cette Paix , qui

en

en puisse comprendre le merite, & qui soit capable d'en goûter & sauouer les precieuses delices. C'est pourquoy l'Esprit de Dieu la represente par la *manne* *Apo. 2.* *cachée, & par vn caillon blanc, où est écrit vn nouveau nom, que nul ne connoit sinon celuy qui le recoit.*

Or nôtre Seigneur Iesus Christ apele cette Paix-là la Paix : *Je vous laisse la Paix, Je vous donne ma Paix* ; Et cela, *i. Cor. 2.* 1. Parce que toutes les promesses de Dieu sont Ouy en luy, & Amen en luy ; Et qu'il est le seul & vnique fondement de l'*Al- liance de Paix*, que Dieu a promise aus Patriarches, qu'il a predite par les oracles des Prophetes, & qu'il a figurée par toutes les ombres & les ceremonies de la Loy Mosaique.

II. Parce qu'il nous l'a meritée par sa mort & passion, & qu'il nous l'a aquisé par son precieus sang. C'est ce que le Prophete Esaïe auoit predit plusieurs *Es. 53.* siecles auparauant, *Il a esté navré pour nos forfaits & froissé pour nos iniquitez : l'amende qui nous aporte la Paix est sur luy, & par sa meurtrissure nous auons guerison.* C'est ce que l'Apôtre S. Paul enseigne magni-

magnifiquement en toutes les Epîtres. Nomément au 5. des Romains. Lors, dit-il, que nous étions ennemis, nous auons esté reconciliez avec Dieu par la mort de son Fils. Et au 2. des Ephesiens, Par Iesus Christ, vous qui estiez autrefois loin estes aprochez par le sang de Iesus Christ : car il est nôtre Paix, qui de tous les deus en a fait vn, ayant rompu la clôture de la paroy entre-moyenne : Ayant aboly en sa chair l'inimitié : afin qu'il créât les deus en soy-même en vn homme nouveau, en faisant la Paix ; Et qu'il r'aliât les vns & les autres en vn corps à Dieu par la Croix, ayant détruit en elle l'inimitié. Et au premier des Colossiens, Le bon plaisir du Pere a esté de reconcilier toutes choses avec soy par Iesus Christ, ayant fait la Paix par le sang de sa Croix, à sauoir tant les choses qui sont aus Cieux, que celles qui sont en la Terre. Comme l'échelle de Iacob, qui d'un bout touchoit le Ciel, & de l'autre la Terre, est la figure de Iesus Christ vray Dieu & vray homme, qui nous a reünis & reconciliez avec Dieu, & nous l'a rendu propice & fauorable : Aussi le Patriarche qui dort au pied de cette mystérieuse

Gen. 28.

sterieuse échelle, represente le pauvre pecheur, dont Iesus Christ a fait la Paix & la propiciation ; Et duquel la conscience repose au pied de la Croix de cet incomparable Mediateur. Remarquez aussi que les robes blanches qui sont le symbole de la Paix, dont jouissent les Saints qui triomphent dans le Paradis, ont esté *lanées & blanchies au sang de l'Agneau* : pour nous apprendre que cette glorieuse Paix ne leur a esté acquise que par le merite infiny de Iesus Christ crucifié.

III. Non seulement nôtre Seigneur & Sauueur nous a merité cette Paix triomphante : mais il a voulu en estre luy-même le Heraut. Car durant le jour qu'il a fait au monde, *il a euangelisé la Paix à ceus qui étoient près, & à ceus qui étoient loin.* Il a accompli ce qui auoit esté predit par le Prophete Esaïe, *L'Esprit du Seigneur l'Eternel est sur moy : C'est pourquoy il m'a oint pour euangeliser aus debonnaires. Il m'a enuoyé pour medeciner ceus qui ont le cœur froissé, pour annoncer aus captifs liberté, & aus prisonniers ouverture de la prison : Pour publier l'an de*

la bien-vueillance du Seigneur, & pour consoler tous ceux qui sont en dueil : pour dire à ceux de Sion qui sont en dueil : que magnificence leur sera donnée au lieu de la cendre : l'huile de ioye au lieu de dueil ; & le manteau de loüange au lieu de l'esprit étourdy.

iv. L'Euangile de ce Prince de nôtre salut est apelé par excellence, l'Euangile de Paix. Et le Saint Esprit applique Ephes. 6 que aus Apôtres qui ont publié cet Euágile par tout l'Vniuers, ce qui auoit esté dit de ceux qui annonçerent les Rom. 10 bonnes nouuelles de la Paix que Dieu Esai. 52. fit avec le peuple d'Israël, lors qu'il le deliura de la captiuité de Babylone, O que les pieds sont beaux de ceux qui annoncent la Paix!

v. Le Ministere de l'Eglise Chrétienne est vn Ministere de Paix & de 2. Cor. 5 reconciliation ; Et autant qu'il y a de Ministres de Iesus Christ, ce sont autant de Herauts de sa Paix. Car bien que nous ne soyons point Apôtres, & que Rom. 10 nôtre voix ne retentisse point iusques au bout du Monde, nous pouuons dire avec S. Paul, que Dieu a mis en nous la Pa- 2. Cor. 5 role

role de reconciliation ; Et avec S. Pierre,
Act. 10. que Nous annonçons la Paix de par Iesus
Christ le Seigneur de tous.

vi. Disons encore , que cette sainte
 & diuine Paix , est la Paix de I. Christ,
 parce qu'il la forme en nos cœurs par
 son Esprit : comme il est dit au 5. des
 Romains, que *la dilection de Dieu*, c'est à
 dire, le sentiment de son amour & de sa
 Paix, *est épanchée en nos cœurs par le Saint*
Esprit. Et au 14. chap. *Le Royaume de Dieu*
n'est point viande ni brunage, mais Justice,
ioye & Paix de par le Saint Esprit. C'est
 dequoy nous auons vne riche figure au
 8. de la Genèse : car comme le Deluge
 represente le iugement de Dieu & sa
 justice vengeresse , & que l'Arche est le
 type de l'Eglise , en laquelle Dieu nous
 sauue : Aussi l'oliuier est l'Image de Je-
 sus Christ le vray oliuier franc , en qui
 nous sommes entez : la colombe est le
 signe & le symbole du saint Esprit ; Et
 la feuille d'oliue que ce pigeon aporta
 à Noé, est l'embleme de la ioye & de
 la Paix , qui sont les dous & agreables
 fruits de cet Esprit & les admirables
 productions de sa grace.

vii.

VII. Enfin, l'Ecriture Sainte dit en propres termes, que Iesus Christ est NOTRE PAIX, pour nous apprendre *Ephes. 2* que nôtre vraye Paix découle & procede de luy seul; Et que hors de luy il n'y a que trouble d'esprit & que frayeurs de conscience. Tout ainsi que cet adorable Seigneur entrant dans vne *Mat. 14* nasselle agitée de la tempête, couverte de flots, & toute prête à estre submergée, rança les vents, apaisa la Mer, & mit dans le vaisseau vne tranquillité parfaite: De même lors qu'il entre dans vne ame qui tremble pour la crainte de la vengeance du Ciel, qui est enuvelopée de profondes tenebres d'affliction, & qui est sur le point d'estre engloutie d'un eternal desespoir, il en chasse la peur, il en dissipe la tristesse & l'angoisse, il y scelle sa Paix, il y sème sa ioye, il y repand les consolations de son Esprit; & d'un Enfer de gênes & de tourmens, il en fait un Paradis de delices.

DE LA PAIX DV MONDE:

*Et en quoy elle difere de la Paix
de Iesus Christ.*

Z z Lors

Lors que nôtre Seigneur Iesus Christ dit à ses Apôtres, *le vous laisse la Paix: le vous donne ma Paix*; non seulement il leur donne cette sainte & diuine Paix qu'il a meritée sur sa Croix, & qu'il forme par son Esprit dās le cœur des Eleus: mais il fait vne tacite oposition entre cette incomparable Paix, & toutes les autres, de quelque nature qu'elles puissent estre.

Sur tout il l'opose, premierement à la Paix de Satan, qui est la plus dangereuse de toutes les guerres. Car comme **2. sam. 8. 2.** Nahas le Roy des Hammonites, ofroit la Paix aus habitās de Iabés de Galaad, à condition de leur recuer l'œil droit, & qu'ils le seruissent à iamais: Ainsi le Diable laisse viure en Paix & en repos tous les pecheurs dont il aueugle l'entendement, & dans le cœur desquels il a vn empire absolu. Il n'a garde de recueillir la conscience de ceus qu'il entraîne sans resistāce dans l'abyme d'une eternelle damnation.

En second lieu, il l'opose à la Paix de nôtre propre chair. Car il y a vne letargie spirituelle & vne securité profane, qui

qui imite le doux & agreable repos des enfans de Dieu. Cette malheureuse chair, ennemie d'elle même, se rend partifane du Diable; Et elle apprend de ses ruses infernales, le moyen de nous trahir & de nous perdre. Elle nous flatte & nous endort dans le giron de ses infames voluptez; Et nous ayant lié de ses chaines, elle nous liure entre les mains de cet irreconciliable ennemy. O cruelle Delila! que tes charmes & tes apâts trompeurs font mille fois plus à craindre que toutes les armes, & toutes les armées de la terre.

Enfin, Iesus Christ opose sa Paix à la Paix du monde, telle qu'elle est en elle-même, & eu égard à la maniere selon laquelle le monde la dōne. *Je vous laisse la Paix: je vous dōne ma Paix; & ie ne vous la donne point comme le monde la donne.* C'est à dire, nō seulement ie vous donne vne Paix que le monde ne vous donne point, & qu'il ne vous peut donner: mais ie ne vous la donne point de la façon que le monde donne la siēne. C'est de cette double oposition entre la Paix de Iesus Christ & la Paix du monde, que

Z z 2 nous

nous auons maintenant à vous entretenir, avec l'assistance de Dieu.

I. La Paix du monde est vn bien que les enfans de ce siecle comprennent & qu'ils desirent, s'ils ont vne étincelle de prudence. Il faut estre plus que barbare, & prendre plaisir au sang & au carnage, pour ne point souhaïter la Paix, lors qu'elle se peut obtenir par des moyens iustes & legitimes. Mais tant s'en faut que le monde souhaïte la Paix de Iesus Christ, qu'il ne la cōpréd point du tout.

1. Cor. 2. Car l'homme ne comprend point les choses qui sont de l'Esprit de Dieu : elles luy sont folie, & il ne les peut entendre, d'autant qu'elles se discernent spirituellement. Comme

Esaië 5. il apele le bien mal, & le mal bien : & qu'il fait les tenebres lumiere, & la lumiere tenebres : l'amer dous, & le dous amer : Ainsi il croit estre en Paix lors qu'il fait la guerre à Dieu, & la Paix de Iesus Christ luy semble vne guerre insupportable. C'est pourquoy l'Apôtre

1. Cor. 2. S. Paul parlant de cette Paix-là, & des biens qui nous en reuiennent, dit que ce sont les choses qu'œil n'a point veues, qu'oreille n'a point ouïes, & qui ne sont point montées

montées en cœur d'homme, que Dieu a promises à ceux qui l'ayment : mais que Dieu nous les a renouvelées par son Esprit. De sorte que comme Iesus Christ disoit à ses Apôtres, l'ay à manger d'une viande que vous ne saluez point : Ainsi les Enfans de Dieu peuvent dire aus gens du monde, Je possède vn repos d'esprit, & vne paix de conscience : Je sens dans mon cœur vne ioye spirituelle, & des consolations celestes, que vous ne pouvez comprendre.

2. La Paix du monde n'est qu'avec le monde même : Et tel se trouue en bonne intelligence avec les enfans de ce siecle, qui est en guerre avec Dieu & avec soy-même. Ne saluez-vous pas, que l'amitié du monde est inimitié contre Dieu ? Et que celuy qui voudra estre amy du monde, se rend ennemy de Dieu ? Mais nul n'a la Paix de I. Christ qui ne soit bien avec Dieu & avec les bons Anges, & qui ne possède son ame en Paix. Et même ie puis dire, qu'il ne tient pas à luy qu'il ne viue en Paix avec tous les hommes du monde, selon l'exhortation de S. Paul, S'il se peut faire autant qu'en

vous

vous est ; ayez Paix avec tous hommes. Ou Dieu conuertit enuers nous le cœur de nos plus cruels ennemis : Ou bien il dissipe leurs conseils, & aneantit tout ce qu'ils entreprennent contre sa gloire, & contre nôtre salut ; selon cette magnifique promesse, Nulles armures forgées
Isa. 54. contre toy ne viendront à bien ; & tu rēdras conuaincūe toute langue qui se sera élevée, contre toy en iugement.

3. La Paix du Monde ne regarde que le corps & l'exterieur de l'homme ; Mais la Paix de Iesus Christ penetre iusques au fond du cœur, & elle répand ses diuines douceurs iusques dans les entrailles.

4. La Paix du Monde ne nous deliure que des maux temporels, & des incommoditez de cette vie : Mais la Paix de Iesus Christ nous deliure des pēnes éternelles de l'Enfer, & des tourmens infinis de la gêne de feu, où il y a pleur & grincement de dents.

5. La Paix du Monde ne nous promet que des biens corporels, & de peu de durée : Mais la Paix de Iesus Christ nous fait esperer des biens spirituels & éternels ;

eternels; Et qui plus est, elle nous en donne les premices, & les avant-goûts.

6. La Paix du Monde ne nous exempte pas de toutes sortes de maus & de miseres, Et il y a tel qui se trouue plus incômodé en tems de Paix qu'en tems de guerre: Mais celuy qui a la Paix de Iesus Christ ne peut estre miserable. Car ou Dieu le met à couuert de tous maus, ou il conuertit les maus en biens, & tire la lumiere des tenebres. Cette Paix de Iesus Christ vaut mieus que le Monde même avec toute sa gloire, & toutes ses richesses.

7. Il n'y a point dans le Monde de Paix si auantageuse, qui puisse plaire à toutes sortes de personnes, & qui soit capable de satisfaire à toute leur atente. Le Monde n'a point assez d'honneurs, de tresors & de plaisirs pour éteindre la soif, & l'alteration de tous les ambicieux, de tous les auares, & de tous les voluptueux: Mais la Paix de I. Christ rauit en vne sainte admiration tous ceus qui la possèdent. Elle les comble de toutes sortes de biens: Elle soule tous leurs desirs: Elle couronne toutes leurs

Zz 4 espe-

esperances. Ce Prince de Paix a dans ses mains plus de Couronnes & de Diadèmes, qu'il n'y a d'étoiles au Ciel : Il a une Mer de richesses, qui ne peut estre épuisée, & des fleuves de delices, qui ne tarissent jamais.

8. Les fruits de la Paix du Monde sont pour les bons & pour les méchants, & souvent plutôt pour les méchants que pour les bons. Mais les doux & agréables fruits de la Paix de Jesus Christ ne se recueillent que par les ames pieuses, qui adorent ce Roy de Paix en esprit & en verité. *Car il n'y a point de Paix, pour les méchants, a dit mon Dieu.*

9. Il n'y a point dans le Monde de Paix si generale qui s'étende à toutes sortes de personnes. La plus favorable Paix ne met pas à couvert tous les excès, & toutes les violences de la guerre. Elle se reserve la punition & la vengeance exemplaire des crimes les plus enormes. Mais la Paix de Jesus Christ tend les bras à tous les peuples, & à toutes les Nations de la terre. Elle n'excepte point les plus criminels de leze-Majesté diuine; Et il n'y a point de si
grand

grand pécheur qui ne jouisse de toutes les graces & de tous les biéfais de cette bien-heureuse Paix, pourueu qu'il la vienne demâder avec des larmes d'une serieuse repentance.

10. Les auantages de la Paix du Monde ne sont que pour les viuâs: Les morts n'y ont point de part, & avec leur soufle toutes leurs esperâces se sont éuanoüies. Et sur ce sujet il se peut dire, que *l'un seme* Jean 4. *me & l'autre moissonne.* Car tel seme la Paix par ses trauaus, & l'arrose de sa sueur, qui n'en cueille point le fruit. Le plus grand Roy & le plus victorieus Monarque du Monde, en donnant la Paix à ses Sujets, ne sauroit rendre la vie à ceus qui l'ont perduë à son seruice, & qui ont arrosé ses lauriers de leur sâg. Mais la Paix de Iesus Christ épand ses diuîâes faueurs sur les morts & sur les viuans. Et nôtre incomparable Monarque, qui *tient en ses mains les clefs de la* Apoc. 2. *vie & de la mort,* ressuscite ceus qui meurent en son Alliance, & les couronne d'une immortalité glorieuse & triomphante.

11. La Paix du Monde la plus florissante

sante & la plus glorieuse, renferme tout son repos, toute sa felicité, & routes les esperances dans les bornes de cette vie. Mais la Paix de Iesus Christ a trois degrez de gloire & de beatitude. Le premier est en cette vie : car dès que cette bien-heureuse Paix est receüe dans le coeur, elle y allume *une ioye inenarrable & glorieuse*. Et le Prince de Paix dit à l'ame fidele ce qu'il disoit autrefois à Zachée, *Aujourd'uy le salut est entré chez toy*. C'est pourquoy il ne dit pas seulement que *celuy qui troit en luy*, c'est à dire, qui par vne vrave & viue foy embrasse la Paix, qu'il a aquisie par son sang, *aura*, mais qu'il a la *vie eternelle*, parce qu'il en a les premices & les avant-goûts. Le second degre de cette Paix est, lors que Dieu nous ouvre les portes de sa Jerusalem celeste, & qu'il nous reçoit en la glorieuse compagnie de l'Eglise triomphante. Car c'est alors que nous nous reposons en Paix de tous nos trauaux, & que toutes larmes sont essuyées de nos yeus. C'est alors que le Prince de nôtre salut, le Chef & le consommateur de nôtre foy, couronne tous nos combats, & qu'il nous

nous reuēt d'vne magnifique robe de Paix. C'est alors qu'il nous crie du Ciel par son Esprit ; *Tu seras aujourd'uy avec moy en Paradis. Rien, bon seruiteur & loyal,* Luc 22.
Mat. 25
entre en la ioye, & en la Paix de ton Seigneur. Le troisiéme degré de la Paix de Iesus Christ se verra au dernier iour, lors que ce grád Dieu & Sauueur viendra en son aparition & en son regne pour iuger les viuans & les morts. Car bien que nôtre ame en dépouillant ce corps mortel reuête vn habit de lumiere & de gloire, & qu'elle jouit dans le Ciel de la magnifique Paix de son Sauueur : neantmoins pendant que ce pauvre corps demeure en la poudre de la terre, c'est vn reste de nos anciennes miseres, & vne marque de la victoire de Satan. Il en est tout ainsi que lors qu'après la Paix on voit encore des ruines & des tristes monumens de la guerre. Mais lors que Iesus Christ viendra des Cieux avec les Anges de sa puissance, il réparera toutes nos ruines, & efacera toutes les traces de nos desolations. Il releuera nos corps abatus par la mort, & les rendra conformes à son corps glorieux.

Apoc.
20.

2. Cor.
15.

Apoc.
21.

rieux. Et afin que rien ne puisse jamais troubler nôtre repos & ralumer la guerre, il détruira iusques au dernier de tous nos ennemis. Il iettra le Diable en l'etang ardent de soulfhre & de feu, avec la Beste & le faus Prophete, pour y estre tourmentez iour & nuit & aus siecles des siecles. Et non seulement il precipitera le Diable & toute son armée d'as l'abyme de ce tourment infiny : mais *il engloutira la mort en victoire*, de sorte que *la mort même ne sera plus* ; Et il n'y aura plus de deüil, ni de cry, ni de travail : car les premieres choses seront passées. Alors la Paix de Iesus Christ sera au souverain degré de sa gloire & de sa pompe. Comme il n'y aura plus rien à craindre, il n'y aura plus rien à desirer. Car non seulement nous serons couronnez de la gloire des Saints, & reüetus de la lumiere des Anges : mais Dieu luy-même, qui est la source inépuisable de Paix & de Felicité, *sera tout en tous*. 12. Enfin, la Paix du monde est comme vn songe qui passe, & comme vne fumée qui s'enuole : Mais la Paix de Iesus Christ est solide & permanente, &

& rien ne la peut ébranler : Comme Dieu luy-même nous en assure par son Prophete, *Quand les montagnes se remueroient, & les côtes croleroient, l'aliance de* ^{Es. 54.} *ma Paix ne bougera point.* Et c'est pourquoy elle est représentée par vn arc celeste de couleur d'emeraude, pour nous ^{Ap. 10.} apprendre que c'est vne Paix eternelle, & qui est touîjours en sa force & en sa pléne vigueur.

Vous voyez donc bien que ce n'est point sans raison que Iesus Christ disoit à ses Apôtres, *Vôtre cœur se réjouira, &* ^{Iean} *personne ne vous ôtera votre ioye; Et qu'il* ^{16.} *leur dit en ce lieu; Je vous laisse la Paix: Je vous donne ma Paix; & ie ne vous la donne point comme le monde la donne.*

Si la Paix de Iesus Christ, considerée en elle-même; difere d'auec la Paix du monde; elle difere encore dauantage au regard de la maniere selon laquelle elle nous est donnée par son auteur.

1. D'ordinaire le Monde ne donne sa Paix qu'à regret, & par vne espeece de contrainte Mais Iesus Christ nous donne la sienne volontairement, & par vn pur mouuement de charité. La poudre

&

& le neant ne peut contraindre l'Infini
 & le Tout-puissant: Comme il le declara
 re luy-même par ces paroles, *Forceroit-il
 sa force? Qu'il face la Paix avec moy,
 qu'il face la Paix avec moy.*

2. Selon toutes les règles & les maximes du Monde, c'est aus Sujets à demander la Paix à leur Prince; Et c'est aus plus foibles & aus vaincus à la demander aus plus forts & aus victorieux. Mais Iesus Christ, qui est le Roy des Roys & le Seigneur des Seigneurs, & qui a vn pouuoir absolu au Ciel, en la Terre, & dans les abymes; de sorte que rien ne peut resister à sō bras victorieux, n'a point eū honte de descendre de son trône celeste, & de venir rechercher notre aliance, & nous offrir sa Paix.

3. Il n'y a point au monde de Roy ni de Monarque, qui pouuant sans hazarder sa Couronne, écraser des Sujets rebelles & criminels de leze-Majesté, leur voulût donner la Paix, pendant qu'ils continuent dans leur rebellion, & qu'ils s'opiniâtrent dans leur crime: Mais lors que Iesus Christ est venu du plus haut des Cieux pour nous donner

la Paix, nous étions dans les fureurs de la rebellion contre Dieu, & dans le plus noir de tous les crimes de leze-Majesté divine : Et qui plus est, ces monstres d'Enfer étoient nos passe-tems, & nos delices. O profondeur des richesses de la Sapiëce & de la cōnoissance de Dieu ! O charité & misericorde infinie, qu'il y a de plaisir & de douceur à se plonger & à se perdre dans vos abymes ! Rom. 11

4. Le Monde ne donne sa Paix que lors qu'il en espere quelque profit : Mais Iesus Christ donne sa Paix à ceus qui ne luy peuvent apporter aucune vtilité : car nôtre bien ne parvient pas iusques à Dieu. Qui est-ce qui luy a donné le premier, & il luy sera rendu ? Car de luy, & par luy, & pour luy, sont toutes choses. 1^{re}. 16.
Rom. 12

5. Le Monde en donnant sa Paix aus autres, se donne du repos à soy-même, & se deliure de beaucoup d'inquietude. Car les plus sages & les plus iudicieux estiment, qu'il ne faut rien negliger en la guerre, & que c'est vn prejuge de ruine, que de mépriser son ennemy, pour foible qu'il puisse estre.

Mais

Mais Iesus Christ dōne sa Paix à de misérables vers de terre, qui n'étoient pas capables ni d'obscurcir les rayons de sa Gloire, ni de diminuer le tresor de ses inépuisables richesses, ni de troubler le repos dont il jouit de toute éternité.

6. Souuent le Monde ne donne sa Paix que de la lague, & du bout des lèvres: Mais cōme la Paix de Iesus Christ est en sa sainte bouche, elle est aussi en sō cœur diuin. Et plutôt à Dieu que nous l'acceptassions d'aussi bon cœur, qu'il nous la donne; Et que lors qu'il nous demande ce que Iehu demandoit autrefois à Ionadab, *Ton cœur est-il aussi droit vers moy que mon cœur est vers le tien?* Nous pussions luy répondre en bonne conscience, *Il l'est, Seigneur, voire il l'est.*

7. Souuent le Monde donne vne Paix frauduleuse; Il promet vne chose & il en donne vne autre: Comme le perfide Laban, qui trompa malicieusement Iacob apres sept ans de fidele seruice. Mais Iesus Christ non seulement nous donne la Paix que nous lay demandons, & que nous espérons de sa

2. Rois
10.

Gen. 29.

sa bonté : mais il nous la donne mille fois plus heureuse , plus magnifique , & plus triomphante , que nous ne la pouvons concevoir. Car la dilection de Iesus Christ surpasse toute connoissance ; Et ce puissant & misericordieux Sauveur fait en nous *par dessus tout ce que nous demandons & pensons.*

8. Le Monde non seulement donne le change sous le voile de la nuit , & couvre ses perfidies d'une infinité d'artifices & de faus pretextes : mais quelquefois il manque à ses promesses , & viole sa foy à la veüe du Soleil : Il cherche de la gloire en sa confusion , & louë cette maxime forgée dans les Enfers , *Qu'il faut tromper les enfans avec des osselets, & les hommes avec les sermens.* Pour preuve de cette verité ie ne saurois rien alleguer de plus autentique, que ce qu'un illustre Cardinal , Ambassadeur de nos Rois en la Cour de Rome , nous assure avoir ouï dire plusieurs fois à un Pape des plus fameux qui aye iamais regné. Je vous prie de le lire vous-mêmes dans les Lettres de ce fidele Ministre d'Etat : Car si j'en

Plutarque en la vie de Lyfandre.

Le Cardinal d'Osse liure 3. Lett. 81. De Rome le 1. Fevrier 1597.

A a a

faisois

faisois icy retentir les paroles, ie craignois qu'elles ne fendissent la voute de ce temple. Mais il ne s'est point trouvé de fraude, en la bouche du Seigneur Iesus; Et iamais il ne trompa ses plus
 1. Pier.
 2. grands ennemis, bien loin de manquer aus promesses qu'il fait à ses enfans. Les Cieux & la Terre passeront: mais ses paroles ne passeront point, qu'elles ne
 Math.
 5. soient toutes accomplies, & même *iusques à vn seul iota.*

9. Lors que le Monde témoigne exterieurement le plus d'amour & de tendresse, c'est d'ordinaire lors qu'il nourrit au dedans le plus de haine & d'animosité, & qu'il est prest de jeter
 Ps. 55. son venin, & d'exercer sa rage. *Les paroles de sa bouche sont douces comme le miel, mais la guerre est en son cœur.* Et comme
 Plutar- autrefois les Parthes faisant la guerre
 que en aux Romains, il couure ses armes les
 la vie plus mortelles d'une robe de Paix. Té-
 de Cras-
 sus. moin vn Ioab, qui perce Hamasa de son épée en le caressant, & en luy
 2. Sam. disant, *Tu portes tu bien, mon frere.* Té-
 20. moin vn Iudas, qui trahit nôtre Sei-
 Math. gneur en le baissant & en luy disant, *Bien*
 26.

te soit. Et témoin soient encore ces Egyptiens du tenus passé, qui en embrassant les hommes, les étrangloient. Mais Iesus Christ donne efectiuement sa Paix à tous ceus auxquels il la promet, & il n'assure personne de son amour, qu'il ne le mete *comme un cachet sur son* ^{Cant.} *cœur*, & qu'il ne le rende immortel & bien-heureus.

10. Bien que le monde promette sa Paix en toute sincerité, il n'a pas toujours le moyen d'acomplir ses promesses : Et bien qu'il ait la volonté, il n'a pas toujours le pouuoir d'empêcher la ruine & le meurtre de ceus qui se mettent en sa protection. Témoin le ^{2. sànt.} Roy Dauid, qui auoit traité de bonne foy avec Abner le General de l'armée d'Israël : mais il ne le put garentir des mains sanguinaires de Ioab, qui le tua par vne lasche & infame trahison. Dauid pleura sur le tombeau de ce grand Capitaine, & il ne fut pas en son pouuoir de luy rendre la vie. Mais en Iesus Christ le dire & le faire, le promettre & l'acomplir, est vne même chose : Car il a yn pouuoir infiny

Rom. 8.

qui égale son amour. De sorte que rien ne nous peut separer de sa dilection : ni la famine, ni l'espée, ni la vie, ni la mort, ni les Anges, ni les Principautez, ni les Puissances, ni hauteur, ni profondeur, ni aucune autre creature. Mais en toutes ces choses-là nous sommes plus que victorieux par celuy qui nous a aimez. C'est-pourquoy cét inuincible Seigneur, qui donne le nom de *brebis* aus ames humbles & debonnaires, qui embrassent sa Paix, les console par ces douces paroles. *Je connois mes brebis*, c'est à dire, Je les aime, & en ay vn soin particulier, & *je leur donne la vie eternelle. Elles ne periront iamais. Nul aussi ne les raura de ma main. Mon Pere qui me les a données est plus grand que tous. & personne ne les raura des mains de mon Pere.*

11. Pour abreger les autres differences, la Paix du monde s'écrit avec de l'ancre : Mais la Paix de Iesus Christ a esté écrite & signée de son propre sang.

12. Le monde peind sa Paix sur du papier, ou sur du parchemin : Mais Iesu

Iesus Christ graue la sienne sur les plaques charnelles de nos cœurs.

13. C'est la plume & le pinceau d'un homme mortel, qui écrit & qui peint la Paix du monde : Mais c'est le doigt même du grand Dieu viuant, qui graue la Paix de Iesus Christ, & qui en represente ladiuine beauté.

14. La Paix du monde ne se scelo qu'exterieurement avec de la cire : Mais la Paix de Iesus Christ se scele & exterieurement, par un double seau, qui sont les Sacremens du Batême & de la sainte Cene, & interieurement, par le S. Esprit. C'est-pourquoy l'Apôtre dit à ceus qui ont receu en leur cœur cette Paix de Iesus Christ, *Vous avez esté scelez du Saint Esprit de la promesse, qui est l'arre de nôtre heritage, iusques à la redemption de sa possession acquise, à la loian-ge de la gloire de son nom.* Eph. 1.

15. Dans le seau de la Paix dumonde on voit l'effigie perissable de quelque Prince terrié : Mais dás le seau de la Paix de Iesus Christ on aperçoit l'image eternelle de ce Roy du Ciel & de la Terre & de toutes les creatures qui y sont.

16. La Paix du monde ne se publie que par des hommes du commun: Mais la Paix de Iesus Christ a esté publiée, non seulement par les Saints Apôtres, mais aussi par les Anges de Dieu, & par Iesus Christ luy même. Car bien qu'il soit le Prince & la cause meritoire de cette Paix, il n'a pas dedaigné d'en estre le Heraut.

17. La Paix du monde la plus generale, ne se publie qu'en quelque coin de la terre habitable: Mais la Paix de Iesus Christ a esté publiée dans le Ciel, & elle se doit publier par tout l'Vniuers. Les bonnes nouuelles en doiuent estre portées iusques au bout du monde.

18. Comme le monde donne sa Paix lors qu'il croit que cela luy est auantageus, aussi il la romt lors qu'il trouue qu'il luy en reuient plus de dommage que de profit. Mais la même charité qui a porté Iesus Christ à nous donner sa Paix, l'oblige à nous la conseruer eternellement.

19. Souuent le monde surprend ceus qui se reposent à l'ombre de sa Paix, & il rait les fruits qu'ils en pensent recueillir.

cueillir. Lors qu'ils diront Paix & sur-^{1. Thef.} reté, il leur suruiendra vne soudaine destruction, comme le travail à la femme qui enfante, & ils n'eschaperont point. Mais la Paix que Iesus Christ nous donne est plus inuariable que les rayons du Soleil. Elle est comme l'arbre de vie planté dans le Paradis, qui pro-^{Ap. 21.} duit ses fruits chaque mois de l'année, & dont les feüilles sont pour la santé des Gentils.

20. Les Rois de la terre les plus magnifiques, & qui meritent le plus d'estre honorez de ce glorieux titre de *Peres du Peuple*, n'associent point leurs Sujets à la gloire de leur Royaume. Ils ne leur mettent point de Couronne sur la tête, & ne les font point seoir sur leur thrône. Mais en vertu de l'alliance de Paix, Iesus Christ nous dispose le Royaume des Cieux, comme le Pere luy a disposé. Et si nous perseuerons en cette sainte & diuine Alliance, & que nous luy soyons fideles iusques à la mort, il promet de nous donner la Couronne de vie, & de nous faire seoir en son thrône. ^{Aboc. 2. Apoc. 3.}

21. Le monde communique de ses honneurs & de ses tresors à ceus qui s'ot l'obiet de sa liberalité : mais il ne se donne point soy-même. Mais Iesus Christ en dōnant sa Paix se donne aussi soi même, avec toutes ses graces & tous ses biens. De sorte qu'il demeure en nous, & nous en luy.

Iean 6.

22. La Paix du monde est semblable aus torrens qui se séchent, lors que les chaleurs sont les plus ardentes : Car sa douceur & ses consolations nous manquent en nos plus grandes & pressantes necessitez. Mais la Paix de Iesus Christ est vn fleuve d'eau viue qui ne tarit iamais, & qui nous conduit iusques à Dieu, qui est vn Ocean de delices & de felicité.

L. I. ca. 2.

23. Le monde passe luy-même avec toute sa gloire, & toutes ses pompes; Et souuent les plus triomphans Monarques enseuelissent dans leur tombeau la Paix qu'ils ont donnée à leurs sujets.

Heb. 13.

Mais Iesus Christ est le même hier & aujourduy, & le sera eternellement. Et c'est de son tombeau que nous auōs veu naître cette glorieuse Paix, qui
nous

nous réjouit & nous console en ce siècle & en celuy qui est à venir.

24. Enfin, le monde met la Paix en dehors, & il laisse le dedans de l'ame plein de frayeurs & d'angoisses. Mais la Paix que Iesus Christ nous donne, laisse souvent du trouble & des agitations au dehors, & elle remplit le cœur d'une tranquillité parfaite, & d'un repos celeste. Il en est comme d'un flambeau allumé au milieu d'une forte tour, que les vents qui soufflent de tous côtez ne peuvent éteindre. Mais plutôt c'est elle qui nous met à couvert de tous les vents contraires, & de toutes les tempêtes du Prince de la puissance de l'air. C'est ce que nous enseigne l'Apôtre au 4. des Philippiens, lors qu'il dit, que *la Paix de Dieu garde nos cœurs & nos sens* : C'est à dire, que c'est comme une puissante Reyne, ou un invincible General d'armée, qui pose des gardes tout à l'entour de nôtre ame, afin qu'il n'en approche quoy que ce soit qui puisse troubler sa ioye & ses consolations eternelles. Et c'est à cela que tendent les paroles de nôtre Seigneur Iesus Christ, lors qu'il a dit,

dit, Je vous laisse la Paix, ie vous donne ma Paix; & je ne vous la donne point, comme le monde la donne, il ajoûte, Votre cœur ne soit point troublé, & ne soit point craintif. Mais mon discours seroit trop prolix, si j'entrois plus auant en cette Meditation: Car pour la fin de cet exercice, nous auons encore à appliquer à nôtre vsage les choses qui viennent de nous estre representées.

APPLICATION.

Ames deuotes, considerez avec moy l'adorable bonté de nôtre Createur, qui au lieu de nous exterminer en sa iuste colere, comme des creatures rebelles & noircies de crimes, qui luy faisons la guerre de gayeté de cœur, a voulu nous épargner en ses grandes misericordes, & nous donner vne Paix honorable, & dont toutes les clauses sont à nôtre auantage.

Admirez l'incomprehensible sagesse du Pere, qui dans les riches tresors de son Conseil eternal a trouué le moien de faire grace aux plus grans pecheurs qui combattoient sous les enseignes du Diable,

Diabie , & de les reconcilier avec soy sans violer sa Iustice , & sans obscurcir les rayons de sa gloire & de sa Maiesté diuine.

Admirez l'incomparable charité du Fils , lequel bien qu'il n'estimât point rapine d'être égal à Dieu, nous est venu rechercher iusques dans les Enfers. Il s'est exposé à tous les traits de l'ire de Dieu, afin de nous en garentir ; Et il a rendu ce qu'il n'auoit point rauy. Nôtre Paix ne se pouuant faire sans quelque expiation de nos pechez & de nos crimes , luy-même les a volontairement expiez sur la Croix.

Admirez la vertu infinie du Saint Esprit , qui de membres de Satan , & d'esclaues de la gêne , nous fait enfans de Dieu, & soldats de Iesus Christ : Qui nous fait reietter les œuures de tenebres , & reuêtir les armes de lumiere. O merueille des merueilles ! Toutes les trois Personnes de la tres-Sainte & tres-Glorieuse Trinité trauaillent à cette Paix celeste. Le Pere l'a tirée de son sein, le Fils l'a signée de son Sang, & le Saint Esprit l'a scellée de s^{on} cachet.

Contem-

Contemplez avec moy les celestes
 beautez, & les adorables mysteres de
 cette incomparable Paix. O Sainte &
 diuine Paix ! Qui pourroit dignement
 celebrer vos loüanges ! Vous estes la
 gloire du Ciel & les delices du Paradis !
 Vous estes la fille de Dieu, & la lumiere
 resplandissante qui decoule de sa face !
 Vous estes le precieus legs testamentai-
 re du Sauueur du monde, le prix de
 son sang, & le fruit de sa mort ! Vous
 estes le riche ouurage du Saint Esprit, &
 le plus noble eser de sa Grace ! Vous
 estes l'admiration des Anges, la cou-
 ronne des Saints, & la consolation des
 Martyrs !

Si nous exaltons le bonheur de la
 Paix corporelle, qui fait cesser les cris &
 les alarmes, qui arrête l'efusion du
 sang, & qui éteind le feu qui nous me-
 naçoit d'un embrasement general ; qui
 remedie à plusieurs maus que nous sou-
 frions en particulier, qui nous rend l'a-
 bondance de pain, & nous donne de
 pouuoir posseder en repos & en tran-
 quilité les biens que nous auons receus
 de la main liberale du Seigneur de tou-
 te

te créature : En quel rang de nos felicittez devons nous mettre la Paix spirituelle qui nous delivre de la servitude du peché, de la tyrannie du Diable, des frayeurs de la mort, & des tourmens de l'Enfer ? Qui chasse de nos esprits la tristesse & les angoisses, & qui essuye toute larme de nos yeus : qui nous nourrit du pain des Anges, & nous rassasie de la graisse de la Maison de Dieu : qui éteind des ardeurs éternelles, & nous abruue au fleuve de ses delices : qui non seulement nous remet en la plénie jouissance de tout ce que nous possédions avant cette malheureuse guerre que nous avons faite à Dieu par la suggestion du Diable, & sous sa conduite infernale : mais qui nous donne des biens que tout le genre humain n'a jamais possédez, & sur lesquels nous n'avions rien à pretendre : qui nous découvre vn nouveau monde, & nous rend capables de participer à l'héritage des Saints en la lumière ? Ta Justice, Seigneur, est comme vne haute montagne ; mais tes misericordes sont vn abyssme.

Il n'y a point dans le monde de Paix si glorieuse, & si fort à nôtre avantage, qui fasse que des suiets deuiennent Rois, que le domaine, les richesses & la gloire du Royaume leur apartienne, & que le Roy luy-même soit la part & la portion de leur heritage. Mais par la Paix de Iesus Christ nous sommes faits Rois & Sacrificateurs : le Ciel nous est aquis avec toute sa gloire, & le Paradis avec toutes ses delices. Non seulement elle nous promet vne couronne de gloire, vn trône de magnificence, & des triomphes eternels : mais elle nous donne Iesus Christ luy-même, qui nous est gain à viure & à mourir.

Si nous estimons que c'est vne grande grace & vne precieuse faueur, de voir le visage amiable du Roy, qui *dis-
pe tout mal par son regard*, combien nous deuons nous estimer heureux, de ce que par la Paix de Iesus Christ nous voyons apaisée enuers nous la face de Dieu, dont le regard est la deliuran-
ce de toute sorte de maux & de miseres, & la source inépuisable de tous les biens & de toutes les felicitez: Mainte-
nant

nant nous la voyons comme de loin,
& au trauers d'un voile : Mais vn iour,
aprochant du trône à l'entour duquel
volent les Seraphins, nous la verrons à
découuert ; Et la voyans comme elle
est en sa source, nous serons transfor-
mez en son Image, & rassasiez de sa
ressemblance. O Seigneur, que tu es
bon, & que tu es liberal ! *Tu nous fais con-* *P. Jean.*
noître le chemin de vie : ta face est un rassa- *16.*
siment de ioye ; & il y a en ta dextre des
plaisirs pour iamais.

Quand nous possederions le monde
tout entier avec toute sa gloire & tou-
tes ses richesses : Que nous aurions la
faueur de tous les Roys & de tous les
Monarques de la terre, & que nous
iouissons de tous les plaisirs & de toutes
les voluptez de cette vie, nous serions
les plus miserables de toutes les creatu-
res qui vivent sous le Soleil, si nous ne
possedons la Paix de Iesus Christ, qui
est nôtre souueraine felicité. Car de-
quoy nous seruiron les bonnes graces
de tous les hommes, si Dieu est irrité
contre nous ? Dequoy nous seruiron
tous les tresors, & toutes les pompes, &
les

les vanitez de ce siecle, si nous auons au dedans vn ver qui nous ronge, & vne conscience qui nous bourrelle? Dequoy nous seruira de iouir pour vn moment des delices du peché, si nous de- uons sentir eternellement les ardeurs consumantes d'vn feu qui iamais ne s'éteind? Et enfin, *dequoy nous seruira de gagner tout le monde, si nous faisons perte de nôtre ame?*

Au contraire, en quelque état & en quelque condition que nous puissions estre, nous deuons nous estimer les plus heureux de tous les hommes, si nous auons receue ce don celeste de la Paix de Iesus Christ. Que le monde nous haïsse, & qu'il se declare nôtre ennemy, pourueu que Dieu nous ayme, & qu'il soit nôtre Protecteur. Que les enfans de ce siecle nous méprisent comme la raclure & la baliure de la terre, pourueu que par la Paix de Iesus Christ nous soions mis à part comme les plus precieus ioiaus de la Couronne. Que nous soions plongez dans vne mer d'amertume, pourueu que nôtre ame sauoure les celestes douceurs & les consolations inefables

inefables de cette Paix diuine. Que la Mort abate ce pauvre corps, & le reduise en poudre, pourueu que nôtre ame soit receuë *au faisceau de vie*, & qu'elle iouiſſe plénement de la glorieuſe Paix de son Sauueur. Enfin, que les elemens ſoient diſſous par chaleur, & que la terre brûle entierement avec toutes ſes œuures, pourueu que nous puiſſions dire comme Ieremie durant le ſac & l'embrasement de Ieruſalem, *Le Seigneur eſt ma portion, dit mon ame, & c'eſt-pourquoy i'auray eſperance en luy.* Lam.3.

Pour témoigner nôtre ioye de la Paix qu'il a pleu au Roy de donner à ſon Peuple, nous auons allumé des feus au deuant de nos maiſons; Et pour reconnoiſſance de la Paix que Ieſus Chriſt nous donne, il faut que nous alumions au dedans de nos cœurs des flames, mais plutôt des braſiers, d'amour & de zele. Le feu de nos ruës a eſté preſque auſſi-toſt éteint qu'allumé: mais il faut que ce feu diuin ne s'éteigne iamais, & qu'il nous enleue vn iour dans le Ciel comme le chariot d'Elie. *L'amour eſt Cant.8. plus forte que la mort, & ſes embrasemens*

Bbb ſont

sont des embrasemens de feu : beaucoup d'eaus ne la pourroient éteindre , & les fleuves mêmes ne la sauroient noier.

Mais ne confondons point le Ciel avec la Terre, & le Paradis avec l'Enfer. Gardons nous bien de prendre vne securité profane, & vne letargie mortelle, pour la Paix de Iesus Christ, & pour le vray repos de la conscience. Vous la connoîtrez à ses fruits. La Paix du monde change la face extérieure des choses, & fait poser les armes, mais elle ne change point les hommes, & ne reforme point leur intérieur : elle n'ôte point leurs mauuaises humeurs, & n'éteind point leurs haines ni leurs animositez. Mais la Paix de Iesus Christ fait des hommes nouveaux, & leur inspire de nouueaus desirs & de nouuelles esperances. C'est vn feu celeste, qui non seulement réjoüit & console le cœur, mais qui le sanctifie & qui le rend participant de la nature Diuine. *Si quelqu'un est en Iesus Christ, qu'il soit nouvelle creature. Les choses vieilles sont passées: voicy toutes choses sont faites nouvelles.*

2. Cor.

5.

Le seau de tous les Princes, & de tous les

les Roys de la terre peut estre contre-
fait: mais le feu du Dieu viuant est ini-
mitable. Nous auons appris que ce feu
diuin, qui scele la Paix de Iesus Christ,
est le Saint Esprit luy même : & que
par tout où il scele cette bien-heureuse
Paix , il y imprime l'Image de celuy
qui est le Prince de cette Paix, & qui la
donne de pure grace. Voulons-nous
donc fauoir si la Paix de Iesus Christ
est scelée en nos cœurs , prenons garde
si nous y verrons empreinte la belle &
parfaite image de ce grand Dieu &
Sauueur. Elle a trois principaus traits
qui nous la feront reconnoître: la Sain-
teté, la Iustice & la Charité.

Ames charnelles , qui prenez plaisir
dans l'ordure du vice, & qui vous veau-
trez dans la fange des sales voluptez,
ne vous abusez point sous vne fausse
persuasion de Paix. Car vous n'avez
point encore receu le feu de la Paix de
Iesus Christ , veu qu'il n'a point imprimé
en vos ames l'image de sa Sainteté,
de sa Pureté, & de son Innocence. Infames
creatures , éloignez-vous de cette
Table , où est l'Agneau de Dieu sans

B b b 2 souillure

soüillure & sans tache : car vne chose si sainte & si sacrée ne se donne point aus chiens, & ne se iete point aus pourceaus. Arriere, vous aussi qui brûlez d'auarice, qui portez l'interdit en vos maisons, qui auez vos mains plénes de rapine, d'vsure & d'extorsion, qui vous repaissez de la chair & de la moüelle du pauvre peuple, & qui en buuez le sang & la sueur. Ne vous endormez point en vos profanes delices : La Paix de Iesus Christ n'est point seelée en vostre cœur, veu qu'il n'y a nulle image de la vraie iustice. Comment auriez-vous part aux graces de celuy qui a rendu ce qu'il n'auoit point rauy : veu que vous ne rendez point ce que vous auez rauy à la veuve & à l'orphelin?

Et vous qui auez des cœurs de tigres, qui nourrissez des haines & des animositez infernales, & qui ne respirez que la vengeance, seriez-vous bien si insensé & si furieux que de pretendre à la Paix de Iesus Christ, qui est mort pour ses ennemis, & qui a prié pour ceus qui le crucifioient? Si vous ne pardonnez aux hommes leur ofences, comment

Dieu

Dieu vous pardonneroit-il les vôtres?

Mais vous , Ames religieuses & Chrestiennes, qui avez lau   vos mains en innocence , & repurg   vos c  urs des   uvres mortes pour servir le Dieu viuant : qui vous adonnez    la sanctification & aus   uvres de Iustice : qui avez reu  tu les entrailles de Charit  , de Misericorde , & de Compassions: Dans le c  ur desquels la Paix de Dieu tient la premiere place ; & o   elle est comme sur son trone & dans le Palais de sa gloire , assurez-vous que par la grace de Dieu , vous estes du nombre de ceus    qui Iesus Christ a donn   sa Paix : Veu que vous en ayez vn seau si autentique & si diuin.

Et quant    vous , mes tres-chers Freres , dont la Foy est infirme , & le zele languissant , & la piet   defectueuse , ne perdez point courage : Car si vous gemissez de vos defauts , si vous vous employez    v  tre propre salut avec vne sainte humilit   , & que de tout v  tre c  ur vous aspiriez    la perfection , Dieu acomplira sa vertu en vos infirmit  s , & produira en vous

Bbb 3 avec

avec efficace, & le vouloir & le parfaire, selon son bon plaisir.

Si vous estes venus icy aujourd'uy avec des soupirs ardents, & des larmes de repentance, pour implorer la grace & la misericorde de Dieu, & pour luy demander la Paix qui vous a esté meritée par la mort du Seigneur Iesus, dõt vous celebrez la memoire : aprochez hardiment de cette sainte Table. Non seulement les Ministres de Iesus Christ vous y donneront le seau exterieur de vôtre Paix & de vôtre reconciliation avec Dieu : mais Iesus-Christ luy-même vous seclera par son Esprit la Paix qu'il vous a aquisé par son sang ; Et il criera au domicile de vostre ame, *Mor enfant, tes pechez te sont pardonnez : Va t'en en Paix.* Il vous donnera les premieres gouttes du vin nouveau de son Royaume, dans l'abondance duquel vous noyerez vn iour tous vos ennuis & toutes vos tristesses ; & vous y ferez enyurer pour iamais des delices celestes, angeliques & diuines.

Dieu de Paix, Pere de misericorde, source de toute consolation, qui as tant

cé

cé les vens, & apaisé les flots qui menaçoient nôtre vaisseau de naufrage: Qui as rendu la Paix & la tranquillité à cette grande & populeuse Ville, où il t'a plu de donner retraite & domicile à tes enfans: afermy par ta puissante main, cette bien-heureuse Paix; & fay qu'elle baïse & qu'elle embrasse la Justice, la Verité, la Charité, & toutes les Vertus. Qu'à l'ombre de cette Paix que tu as otroyée à nos prieres & à nos larmes, nous puissions te craindre & te servir, & honorer le Roy, qui est ton image viuante, & luy rendre toute la soumission & l'obeïssance à laquelle tu nous obliges. Conserue l'Aliance de ta Paix à l'Eglise qui se presente icy deuant ta face, pour te rendre ses vœux & pour celebrer tes loüanges. Epan sur elle tes plus precieuses benedictions du Ciel & de la Terre; & luy continuë ton soin paternel, & ta protection diuine. Afermy au milieu de nous ton chandelier d'or: nourris nous à iamais de ta manne, & nous abreuue de tes eaus sail-lantes en vie eternelle. Fay que nôtre ame soit vn petit Sanctuaire où tu ha-

bites & où ton Esprit fasse resplendir la lumiere & la ioye de cette Paix spirituelle & celeste, que le monde ne connoit point. Donne nous les bras d'une viue foy & d'une serieuse repentance, afin qu'avec ton Simeon, nous embrassions aujourd'uy le Prince de Paix, non pas seulement comme l'enfant qui nous est né, & le Fils qui nous a esté donné; mais comme nostre grand Dieu & Sauveur, qui est mort pour nos pechez, & qui est ressuscité pour nôtre iustification. Donne nous de goûter & de savouurer les premices de la glorieuse & éternelle Paix, qui nous attend sur tous les Cieux; afin que lors qu'il te plaira de nous apeler en ton repos, nous disions du cœur ce que nous chantons souvent de la bouche, *Seigneur laisse aller ton serviteur en Paix, selon ta promesse : car mes yeus ont vu ton salut.*

FIN.

SERMON